

UMT-Universitas Airlangga jalin kerjasama

UM 06/05/08 pg. 26

KUALA TERENGGANU 5 Mei - Universiti Malaysia Terengganu (UMT) dipilih oleh Universitas Airlangga, Surabaya di Indonesia untuk menjalin kerjasama dalam bidang penyelidikan akuakultur dan sains perikanan melalui pertukaran penyarahan dan pelajar siswazah mulai pertengahan tahun ini.

Naib Canselor UMT, Prof. Datuk Dr. Sulaiman Md. Yassin berkata, program kerjasama itu akan menyaksikan pertukaran kira-kira lima pelajar prasiswazah dari Malaysia ke Indonesia dan pada masa yang sama, prasiswazah Indonesia ke Malaysia.

Katanya, program itu juga akan melibatkan kerjasama dalam projek penyelidikan, penerbitan berkaitan penyelidikan yang dijalankan bersama selain mengadakan simposium dan aktiviti akademik lain.

Beliau berkata, program selama lima tahun ini akan bermula semester pengajian baru bermula Julai ini.

"Ia juga akan memberi keutamaan dalam pertukaran penyelidikan dan teknikal berkaitan bidang akuakultur dan sains perikanan," katanya selepas majlis menandatangani memorandum persefahaman (MoU) antara Universitas Airlangga dan UMT di sini hari ini.

Universitas Airlangga diwakili oleh Dekan Fakultas Kedokteran Hewan, Prof. Romziah Sidik Budiono.

Sulaiman berkata, UMT telah menyenaraikan pendek pelajar prasiswazah Tahun Dua yang akan menyertai program tersebut.



SULAIMAN Md. Yassin (kiri) bertukar dokumen perjanjian dengan Romziah Sidik Budiono pada majlis menandatangani memorandum persefahaman antara Universitas Airlangga dan UMT di Kuala Terengganu, semalam.

"Di bawah program pertukaran ini, mereka akan menjalani latihan selama sebulan sebelum pulang semula ke UMT," katanya.

Dalam pada itu, beliau memberitahu, UMT kini dalam peringkat perbincangan dengan universiti itu untuk membolehkan

para pelajar kedua-dua negara mengambil program ijazah berkembar.

Katanya, program ijazah berkembar ini yang membolehkan para pelajar mengikuti kira-kira 11 bidang di Universitas Airlangga dan ia dijangka dapat dilaksanakan pada tahun depan.